

POR UNA MONTANYA DIGNA. PIRINEU VIVO 25/10/25

REIVINDICACIONS D'O MOVIMIENTO POR A DIGNIDAT D'A MONTANYA
PA LA MANIFESTACIÓN DE JACA/CHACA



O Movimiento por la Dignitat d'a Montanya ye estau recorrendo lo Pirineu Aragonés de norte ta sud y d'este ta ueste entre los meses de chulio, agosto y setiembre de 2025 rializando decenas d'assemblies con a prohección d'o documental "Por una Montanya Digna". En ixas trobadas i ha participau mas de 1.500 personas d'a Ribagorza, lo Sobrarbe, lo Viello Aragón y d'as comarcas d'o Prepireneu y os Somontanos. En as reunions s'ha replegau lo sentir cheneral d'o nuestro Pirineu y s'ha sintetizau en este documento de reivindicacions, as cualas s'organizan en cuatro pilars: 1. Lo Pirineu no se vende, 2. Vivienda digna, 3. Treballo digno y 4. Servicios. Este documento se ha presentau de vez en Campo y en Chanovas, dos lugares simbolicos por representar a luita sin reblar d'a población d'o Pirineu contra los pantanos. Posteriorment se presenta un anexo con diferents inquietuz d'a población pirenaica replegadas lugar por lugar.

1. LO PIRINEU NO SE VENDE	3
Yesa No	3
No a lo Plan Pirineu	3
Por atro modelo enerchetico	3
2. VIVIENDA DIGNA	4
3. TREBALLO DIGNO	4
4. SERVICIOS	5
Sanidat	5
Educación	5
Comunicacions	5
Extinción d'incendios	5
Cultura propia	6
Anexo I. Reivindicacions replegadas lugar por lugar.	712

1. O Pirineu no se vende

O Pirineu Aragonés y tot l'Aragón rural ye constantment menazau por cualques proyectos privaus que extrayen la riqueza d'o territorio (augua, suelo, electricidat etc.) subvencionadas con grans cantidaz de diners publicos mientras se deixan de costau las necesidaz reals d'as personas que habitamos lo territorio. Ixos proyectos menazan amás l'entorno que i vivimos fendo mal a los nuestros rius, montanyas, campos y selvas. Toz os diners publicos malfurriaus en ixa mena de proyectos han d'estar rendrezaus ta cubrir necesidaz basicas y reals d'o territorio. Apostamos por un nuevo modelo que siga beneficioso pa la nuestra tierra y pa lo nuestro futuro. Somos as personas que habitamos y cusiramos o Pirineu qui queremos decidir sobre as infraestructuras y o modelo de desenrrollo que queremos.

Yesa No

En primer puesto, por chusticia, por seguridat, por historia y por racionalidat en o gasto publico exichimos a renuncia definitiva a lo recrecimiento d'o Pantano de Yesa. O prochecto de recrecimiento s'ha contrimostrau inseguro en multiples estudios tecnicos y ha multiplicau por cinco lo suyo presupuesto inicial, d'os 113, t'os 496 millons d'euros, mientras que ha dividiu por dos la suya capacidat potencial d'almacenamiento d'augua. Ye urchent descartar Yesa antes con antes porque s'ha contrimostrau un prochecto inviable que no beneficia que a las grans constructoras: FCC, ACS y Ferrovial, mientras menaza la supervivencia de Artieda, Sigüés, Mianos y la vida d'a población que vive auguas abaixo d'a presa.

No a lo Plan Pirineos

En segundo puesto, **exichimos o final d'os proyectos faraonicos ligaus a lo negocio d'o esquí y d'o turismo masivo** que amagan pelotazos urbanisticos pa beneficiar a grans inversors privaus con millons d'euros de beneficio a truca d'o nuestro país. En o Pirineu ni queremos ni nos fa falta la unión d'Astún y Formigal por Canal Roya, no queremos ni nos fa falta una telecabina pa unir Benasque/Benás y Cerler/Sarllé ni un eslizador en Panticosa/Pandicosa. Tampoco no nos fa falta un parque tematico en Oroel/Uruel ni una carretera turistica en o Parque Natural de Guara. En cuenta, queremos a protección d'o nuestro patrimonio natural y un modelo de desenrrollo sostenible que chunte lo turismo con a forma de vida d'as personas que habitamos o Pirineu. Queremos un plan pa lo Pirineu d'as personas y pa las personas, no pas o Plan Pirineus d'os beneficios d'bels pocos. Exichimos a protección de Canal Roya en o Parque natural d'Anayet-Partacua.

Por atro modelo enerchetico

En tercer puesto, **apostamos por un modelo enerchetico realment sostenible y que os suyos beneficios reviertan en o territorio**. En l'actualidat o Pirineu produz muita mas enerchía que no acotola, pero manimenos ixa riqueza va ta difuera d'o territorio, en muitas ocasions acabando en mans privadas. Por ixo exichimos o descarte finitivo d'o macroparque solar prochectau en a Fueva, de l'autopista electrica Valsalada-La Luenga-Isona, d'a planta de Biogás de Azlor-Abiego, d'o almacazén de baterías de litio prochectau en a val de Benás / Valle de Benasque (Anciles/Ansils, Sahún, Sesué, Castejón de Sos/Castilló de Sos) y d'o prochectau en Samitier por parte d'a multinacional israelí Enlighth. Tamién demandamos a reversión d'os saltos d'augua que producen enerchía hidroeléctrica pa que sigan chestionaus por una interpresa publica d'enerchía, una simplificación d'os trámites pa la autoproducción d'enerchía solar en os chicoz lugares y la fin d'as macroplantas solars imposadas.

2. VIVIENDA DIGNA

Existe un gran problema de vivienda en o Pirineu Aragonés. **Os pres no s'achustan a las posibilidaz d'a mayor parte d'as personas pa la compra u lo loguero d'una primer vivienda.**

En os puestos mas turisticos, y mas que mas, os cercanos a las pistas d'esquí, lo boom d'os apartamentos turisticos en conchunta con a cantidat de segundas u tercercs residencias, ha feito esclatar os pres y con éls as posibilidaz d'os suyos habitants. Nos trobamos con buena parte d'a población temporal vivindo mesmo en caravanas, que cambia cada temporada, lo que destruye los teixius socials y lo desenrrollo d'o puesto. Una regulación decisiva d'a vivienda turistica ye necesaria pa tornar ta un equilibrio. Eliminar as avantallas fiscals d'os apartamentos turisticos, avals publicos pa chicoz arrendadors promovendo o loguero de larga estancia, vivienda social, promover a restauración de patrimonio a través de alcuerdos de cesión d'uso, u explorar formulas de vivienda colectiva son cualques soluciones que s'ha de prener pa guarenciar o dreito a una vivienda digna.

D'otra man, ye menister aumentar significativament a ufierta de vivienda asequible en os municipios en riesgo de despoblación y fomentar a recuperación d'os numerosos lugares d'o Pirineu que se troban en situación de ruina por parte de nuevos pobladors y antigos vecins.

Ye urchent una acción publica decidida en o Pirineu pa que un bien de primera necesidat deixe d'estar un articlo de luxo u un obchecto d'especulación.

3. TREBALLO DIGNO

O modelo de desenrrollo economico imposau dende la Deputación Cheneral d'Aragón pa lo Pirineu privilechia lo turismo de nieu frent a la resta de sectors economicos. Ixe modelo conleva unas condiciones de vida precarias pa la clase treballadera, ya que promueve treballos temporals que no cubren l'anyo entero, chornals baixos y empregos de baixa cualificación. En l'anyo 1975, lo periodico Andalán publicaba l'articulo “los trabajadores de la nieve: eventualidad, malas condiciones de trabajo y falta de cualificación profesional”. 50 anyos dimpués en 2025 a realidat laboral d'o prencipal sector economico d'o Pirineu no ye cambiada. Se sigue destinando cada anyo millions d'euros de diners publicos a un modelo economico que no proveeix un empleo digno pa la clase treballadera. Amás, se destina las inversiones ta unas vals concretas, afogando las posibilidaz de combatir la despoblación en a resta d'o territorio.

Apostamos decididament por un desenrrollo socioeconomico equilibrau y sostenible, en o cual la prioridat siga guarenciar las condiciones de vida dignas d'a población treballadera y aconseguir un Pirineu vivo y habitau. Por ixo queremos que se diversifique las inversiones destinadas a lo desenrrollo, deixando d'apostar nomás por o turismo de masas en bellas vals concretas y por sectors insostenibles como las macrogranchas. Queremos que s'apueste dende las administracions por sectores que permitan condiciones de treball dignas pa tot l'anyo, como la industria sostenible, la chestión forestal, los oficios ligaus a la construcción, l'agricultura y la ganadería, especialment la extensiva. Tamién buscamos amillorar las condiciones de vida d'as personas que se dedican a l'esquí y a la hostelería, de tal traza que treballen tot l'anyo y no bels pocos meses nomás.

4. SERVICIOS

En o Pirineu Aragonés vivimos una important carencia de servicios basicos, especialment en as poblacions mas chicotas. Pa fer posible la vida en o Pirineu ye imprescindible cudiar y mantener bels servicios publicos de calidat en os ambitos d'educación y de sanidat. Igualment, en o siglo XXI continuamos vivindo un important déficit en as comunicacions, habendo-bi muitos nuclios habitaus que no tienen un acceso digno por carretera, asinas como d'as telecomunicacions, con lugares t'os cuals no plega pro cobertura de mobil y d'internet. D'otra man, cada verano veyemos como mas y mas incendios asolan lo nuestro territorio, por lo que ye necesario meter-les freno a través d'a prevención entre tot l'anyo. Igualment vivimos una important perda d'a cultura pirenenca y la progresiva desaparición d'as nuestras luengas y tradicions, que han d'estar fomentadas y conservadas. Apostamos por politicas publicas decididas que fagan habitable o Pirineu.

Sanidat

Exichimos a las administracions una apuesta real por la Sanidat en os nuestros territorios: Que se contrate a lo personal que fa falta en l'Atención Primaria pa mantener os consultorios y pa poder aviellir con dignidat en toz os nuestros lugares. Que disposemos d'UVI mobil as 24 horas d'o día, os 365 días de l'anyo, porque no podemos trigar cuán enfermar. Que s'invierta los recursos necesarios pa guarenciar l'atención especializada en os hespitals de Jaca/Chaca y Barbastro/Balbastro sin listas d'aspera interminables que nos mantienen enfermos meses y anyos. Que la nuestra salut no siga un alto pre que pagar pa poder vivir en do queremos.

Educación

Exichimos una educación publica de calidat, adaptada a lo hábitat disperso y enamplada a las escuelas infantils de 0 a 3 anyos que permitan la conciliación familiar y laboral en tot o Pirineu. Igualment, demandamos una mayor presencia d'a cultura pirenenca y d'a luenga aragonesa y d'a catalana en a Ribagorza oriental en o sistema educativo.

Comunicacions

Exichimos a construcción d'un puent que permita l'acceso ta Jánovas/Chanovas con auto entre tot l'anyo. Igualment, demandamos que s'apanye y s'acuriose los accesos por carretera ta todas as localidaz d'o Pirineu. Nos posicionamos en contra d'a carretera Bara - As Bellostas por o suyo escaso impacto social y la suya important afección ambiental y a favor d'a finalización d'a A-1604 dentre A Guarguera y Nocito. Tamién ha de revisar-se lo prochecto d'a variant norte de Jaca/Chaca que uniría las autovías A-21 y A-23 porque fa mas de 20 anyos que fue redactau y tiene importants afeccions sociales y ambientales. Por lo que fa a las telecomunicacions, exichimos a l'administración una adecuada connexión a internet en tot o Pirineu y cobertura mobil en toz os lugares. Exichimos tamién a connexión d'o territorio con transporte publico, ya que en a mayor parte d'o Pirineu u bien ye inexistente u ye insuficient.

Extinción d'incendios

A despoblación y l'abandono d'a ganadería extensiva ye produciendo cada vegada una mayor masa forestal en a montanya, amás lo cambio climatico produz una mayor temperatura que se traduz en una

mayor frecuencia d'incendios forestals. Ye imprescindible aumentar a masa laboral de personas adedicadas a la extinción d'incendios y lo empente d'a ganadería extensiva por tot lo territorio pa poder aprevenir os fuegos que se repite cada verano y amortir las suyas grieus consecuencias naturals y socials. A la suya vegada, cuánto a los incendios en nuclios habitaus, ye menister creyar parques de bombers como lo de Berdún pa que nuclios cómo Ansó u Mianos no dependan d'os bombers de Sabiñánigo/Samianigo, situaus a mas d'una hora d'o parque de bombers actual.

Cultura propia

Apostamos por una producción cultural propia dende o Pirineu y pa o Pirineu, que mantenga y recupere la radiz d'as comunidaz humanas que habitamos dende fa siglos estas montanyas. Queremos un fomento real y decidiu d'as luengas aragonesa y catalana, asinas como d'as suyas variedaz dialectals, ya que son estadas entre mas de mil anyos lo vehículo en o cual s'ha expresau la cultura pirenenca. L'acceso t'a cultura en o Pirineu no ha de limitar-se a los cabos de semana y a lo verano, como un mero recurso turistico. Por una programación cultural de calidat entre tot l'anyo, tamién en hibierno y entre semana.

Anexo I. Reivindicacions replegadas lugar por lugar.

Contino se presenta dos u tres reivindicacions especificas de cada lugar que han estau replegadas en as trobadas realizadas lo verano de 2025 en o Pirineu y lo Prepirineu. Se i plasma propuestas realizadas dica lo 25 de setiembre, encara que la dinamica de presentacions y assemblies continua dica lo 25 d'octubre plegando en mas de 50 poblacions, incluyendo capitals.

VIELLO ARAGÓN	8
Jacetania / Chacetania	8
Artieda y Ruesta	8
Ansó	8
Berdún	8
Hecho / Echo	8
Embún	8
Javierregay / Xavierregay	8
Sinués	9
Villanúa	9
Botaya	9
Jaca / Chaca	9
Alto Gállego / Alto Galligo	9
Panticosa / Pandicosa	9
Ibort	9
La Guarguera / A Guarguera	9
Yebra de Basa	10
SOBRARBE	10
Torla	10
Bergua	10
Valle de la Solana / Val d'a Solana. Puyuelo y Burgasé.	10
Ascaso	10
Boltaña	10
Aínsa / L'Aínsa	10
La Fueva / A Fueva	11
Bielsa	11
RIBAGORZA	11
Ubierno	11
Graus	11
Castejón de Sos / Castilló de Sos	11
PREPIRINEO Y SOMOTANOS / PREPIRINEU Y SEMONTANOS	11
Ayerbe	11
Biscarrués	12
Loarre / Lobarre	12
Hoz de Barbastro / Oz de Balbastro	12
OTROS PUESTOS D'ARAGÓN	12
Lituénigo / Lituenigo	12
Teruel	12

VIELLO ARAGÓN

Jacetania / Chacetania

Artieda y Ruesta

- Yesa No. Renuncia definitiva a lo pantano de Yesa.
- Recuperación d'a solidaridat entre lugars pa amillorar o Pirineu entre todas.
- Reversión de propiedaz expropiadas por lo pantano de Yesa a los suyos antigos propietarios y facilidaz pa la recuperación d'os lugars feitos fuera por la CHE.

Ansó

- Aduyas a la ganadería extensiva, permitiendo la incorporación de chóvens t'o sector primario. Por a suya alportación a l'emplego, las suyas valores culturals, cudiau d'a naturaleza y tradición ye necesario emparar la ganadería extensiva y no meter-le estorbos.
- Parque de bombers en Berdún que permita cubrir adecuadament incendios en toda la comarca y que no haigan de venir dende Sabiñánigo/Samianigo cada vegada que bi ha bel incendio en a zona occidental.

Berdún

- Fomentar modelos d'agricultura y ganadería mas socials que permitan que mas chóvens s'incorporen t'o sector primario.
- Amillorar a cobertura de mobil y internet en o municipio, ya que en Biniés por eixemplo bi ha muitos problemas de conectividat y cobertura telefonica.

Hecho / Echo

- Planificar lo relevo cheneracional d'os gremios, ya que muitos fontaners, piquers u electricistas se son chubilando y no bi ha personas que mantengan los servicios.
- Aduyas pa las personas que viven tot l'anyo en os lugars, a lo transporte por eixemplo, ya que pa vivir en un lugar como Hecho / Echo a ormino ye imprescindible desplazar-se ixo suposa un gasto elevau en benzina.

Embún

- Promover una chicota interpresa industrial arredol de Puente la Reina / Puert d'a Reina que permita dar treballo estable y de calidat en a zona.
- Chenerar una politica publica decidida pa amortar los incendios forestals. Los incendios s'amortan en hibierno y ye necesario contratar muita fuerza de treballo pa limpiar los monts.

Javierregay / Xavierregay

- Millora d'o ret de transporte publico pa poder ir ta Jaca/Chaca dende Javierregay/Xavierregay y pa connectar lo territorio.
- Preocupación porque la sola salida laboral que veye la choventut ye lo turismo, chenerando un treballo precario.

Sinués

- Apanyar la carretera d'a Val de Aisa / Val d'Aísa y sobre tot l'acceso ta Sinués.

Villanúa

- Actualment bi ha 2.000 viviendas turísticas y muitos problemas pa acceder t'a vivienda por parte d'a clase treballadera que quiere residir tot l'anyo en o lugar, porque lo pre d'a vivienda ye excesivo.
- Ye menister reforzar os servicios: caixa de correus, fibra optica, caixero automatico, atención primaria de salut y replegada de residuos en verano a causa d'a presión turística.

Botaya

- Ye menister una mayor autonomía en os lugars que dependen d'un nuclio de población mayor. En Botaya dependen de Jaca / Chaca, y esto les suposa problemas cutianos en a chestión de servicios basicos como l'augua, las telecomunicacions u las carreteras.

Jaca / Chaca

- No a Oroel Park ni a lo mirador d'a Raca. Lo Pirineu no ye un Parque Tematico.
- No a la variant norte de Chaca / Jaca en a unión de l'autovía A-21 y l'A-23. Lo prochecto tiene mas de 20 anyos y ha d'estar revisau.
- Uvi móvil 24 horas los 7 días d'a semana pa cubrir la Jacetania/Chacetania y pa no pender d'o servicio ufierto dende Sabiñánigo/Samianigo pa l'Alto Gállego/Alto Galligo y parte d'o Sobrarbe.

Alto Gállego / Alto Galligo

Panticosa / Pandicosa

- Bi ha necesidaz muito mas importants en o municipio que no lo esbarizaculos de Panticosa/Pandicosa.
- En o lugar las viviendas son excesivament caras pa la clase treballadera y lo treballo disponible ye precario y de temporada.

Ibort

- Dar posibilidat de recuperar y rehabilitar vivienda de lugars deshabitaus pa empentar a vida rural. Empentar alcuerdos de cesión pa lugars recuperaus.
- Bi ha un exceso de turismo en o Pirineu y ye menister cambiar de modelo ta beluno mas sostenible.
- Reinventar a ruralidat dende la soberanía d'o territorio. Que podamos decidir dende los nuestros lugars a vida que queremos.

La Guarguera / A Guarguera

- No a la carretera turística Bara-As Bellostas, sí a rematar la carretera d'acceso t'a Guarguera A-1304 y los accesos t'os lugars d'a val. Sí a lo turismo rural sostenible, no a la masificación turística en o Parque Natural de Guara.
- Dotar a la Guarguera de servicios basicos d'augua, cobertura móvil e internet.

Yebra de Basa

- Transporte publico pa connectar lo territorio con frecuencias suficientes, especialment pa cubrir necesidaz de personas mayors y adolescents.
- Problemas d'acceso t'a vivienda, pres desorbitaus pa la clase treballadera.

SOBRARBE

Torla

- Os servicios d'o lugar son toz pensaus pa lo turista. Habría d'haber-bi servicios como transporte publico tot l'anyo, no nomás en temporada de verano.
- Promover una mayor participación d'a población local en a chestión d'o parque de Ordesa - Mont Perdiu, pa que l'administración d'o mesmo no siga exclusiva d'o Gubierno d'Aragón.

Bergua

- Tot sobrepuerto sufrió una expulsión semellant a la d'os pantanos, nomás que debida a la falta total de servicios basicos como carreteras, luz y augua. Ixa expulsión ha d'estar reparada por o profundo dolor que causó en os suyos habitants.
- Bi ha necesidat d'amillorar os servicios basicos: reparación d'a carretera, servicio basico de vasueras y depuración d'o Ríu Ara.

Valle de la Solana / Val d'a Solana. Puyuelo y Burgasé.

- Los lugares recuperaus tienen una valor en o territorio y las suyas comunidaz han de participar en a vida social d'o Pirineu.
- Las problematicas d'o Pirineu Aragonés son extensibles en muitos casos t'o meyo rural en cheneral.

Ascaso

- No a los macroproyectos imposaus en o Pirineu.
- Necesidat de reforzar los servicios publicos de sanidat, educación, extinción d'incendios forestals y cultura.

Boltaña

- n cualques puntos de Sobrarbe se ye empecipiando a notar una masificación turistica en verano, como ye lo caso d'as Gorgas de Boltaña.
- Fomento d'o relevo cheneracional en os oficios porque beluns se son perdendo.
- En Viello Sobrarbe empecipieron a apanyar a carretera pero la han deixada a meyas.

Aínsa / L'Aínsa

- Reversión d'os saltos Hidroeléctricos d'o Sobrarbe pa que se chestionen dende lo publico.
- Creyación d'un marco economico especial pa chicoz proyectos economicos en zonas rurals.

La Fueva / A Fueva

- No a lo macroparque solar prohectau en a Fueva / A Fueva ni a lo almacén de baterías de litio de Samitier d'a multinacional Israelí Enlighth.
- Linias de transporte publico que connecten a comarca, en especial Aínsa con os lugars d'a redolada.
- Millora d'o suministro d'augua. Estando a lo canto de dos grans entibos, tienen carencia d'augua.

Bielsa

- Lo Plan Pirineus no tiene en cuenta la comarca d'o Sobrarbe, los diners publicos pa lo desenrrollo van ta otros puestos.
- Mantenimiento d'a plaza de pediatría en Bielsa y refuerzo d'os servicios publicos de salut.
- Reversión d'as centrals hidroeléctricas d'a cuenca d'a Cinca.

RIBAGORZA

Ubierno

- En Secastilla/Secastiella, La Pobla/La Pobla y Ubierno son argüellosos d'haber aturau un prohecto imposau de placas solars gracias a la unión d'os suyos habitants.
- Reivindican aduyas pa lo turismo rural sostenible, reinventando un modelo que no ye pro pa chenerar una economía digna en o territorio.

Graus

- Importancia que los concellos y comarcas se posicionen a favor d'os intereses d'as personas qui habitamos o territorio y no pas d'as grans interpresas foranas.
- Bi existe problemas de caciquismo y personas con muito poder en Ribagorza, especialment en a Val de Benás / Valle de Benasque.
- Promoción de vivienda habitual en a Ribagorza, especialment de vivienda publica ya que bi'n ha bien poqueta en a comarca.

Castejón de Sos / Castilló de Sos

- Vivienda y treballo digno pa las personas qui quieren vivir aquí. No a la explotación laboral en a hostelería.
- No a la telecabina de Benasque/Benás-Cerler/Sarllé y no a la planta de baterías de litio d'a Val de Benás / Valle de Benasque.
- Transporte publico pa connectar a val y la comarca..

PREPIRINEO Y SOMOTANOS / PREPIRINEU Y SEMONTANOS

Ayerbe

- Argüello de redolada por haber aturau lo entibo de Biscarrués.
- Empentar o loguero alquiler asequible en o meyo rural.
- Treballar por a unidat d'o territorio y por un prohecto común.

Biscarrués

- O Plan Pirineus ye tremendament inchusto porque no s'achugue por un turismo sostenible. S'habría d'achugar mas por o turismo d'auguas bravas.
- Ye menister invertir mas en os servicios en o meyo rural, especialment en cudiaus d'una población aviellida.

Loarre / Lobarre

- No a los retalles en servicios sanitarios, como professionals d'Atención Primaria u farmacia.
- Apanyar a carretera entre Bolea/Boleya y Ayerbe.
- Mayor participación d'o municipio en a chestión d'o castiello pa que ixo important patrimonio revierta mas en o lugar.

Hoz de Barbastro / Oz de Balbastro

- Ye menister protecher o meyo rural d'os lobbys enercheticos y promover a producción renovable en comunidaz enercheticas rurals.
- Aduyas pa apanyar las casas viellas en os lugares pa mantener o patrimonio y facilitar o retorno d'a chent choven.
- Protecher y empentar a cultura aragonesa.

OTROS PUESTOS D'ARAGÓN

Lituénigo / Lituenigo

- Periglo d'a masificación renovable arredol d'o moncayo (eolica y solar).
- Necesitat de fomentar la reivindicación social en a comarca igual que ye ocurriendo en o Pirineu.

Teruel

- No a la masificación d'enerchías renovables, especialment a eolica. Protecher os paisaches de Teruel. Empentar que los beneficios d'as enerchías renovables se queden en o territorio. No a la masificación de energías renovables, especialmente la eólica.
- Lo extractivismo y lo colonialismo interior ye igual en tot l'Aragón Rural por lo que ye necesario organizarse también en tot Aragón.